

摘藻堂四庫全書薈要

集部

欽定四庫全書薈要

集部

御定詠物詩選卷二百八十

二至
四

欽定四庫全書薈要卷一萬八千八百四

集部

御定佩文齋詠物詩選卷一百八十二

紙類

五言古

詠紙

梁宣帝

皎白猶霜雪方正若布基宣情且記事寧同魚網時

詠苔紙

隋薛道衡

昔時應春色引綠泛清流今來承玉管布字改銀鈎

使紙甚費

宋孔平仲

家貧何所費使紙如使水親交或見遺自買不知幾置之几案間數軸俄空矣作字本不工學書非不喜不知何故盡疑若有神鬼若云隨置郵性復懶箋啟間或強為之皆出不得已橫斜若幡脚齟齬如雁齒數易僅能成紛紛多廢委敘致失輕重畏慎防觸抵往往已緘封時時又刪洗遂令巾衍竭大半或緣此昔無楮先生云自蔡倫始假令行竹簡禿野未供使人生有知慧不若

愚且鄙古來取卿相未必皆經史誰教識點畫空耗五
斗米咄嗟為此詩又是一張紙

七言古

答宋學士次道寄澄心堂紙百幅

宋
梅堯臣

寒谿浸楮春夜月敲冰舉簾勻割脂焙乾堅滑若鋪玉
一幅百錢曾不疑江南老人有在者為予常說江南時
李主用以藏秘府外人取次不得窺最後猶存數千幅

致入本朝誰謂奇漫堆閭屋任塵土七十年来人不知
而今制作已輕薄比於古紙誠堪嗤古紙精光肉理厚
邇歲好事亦稍推五六年前吾永叔贈予兩軸令寶之
是時頗敘此本末遂號澄心堂紙詩我不善書心每愧
君又何此百幅遺重增吾報不敢拒且置縑箱何所為
題高尚書藤紙畫雲林煙嶂圖

元柳貫

髯翁昔飲西湖渌滿意看山看不足醉拈官紙寫秋光

割截五州雲一幅吾聞妙畫能通仙此紙度可支千年
祇愁蓬萊失左股六鼇戴之飛上天

送奎章閣廣成局副楊元成奉旨之徽州熟紙
因道便過家錢塘

元傳若金

新安江水清見底水邊作紙明於水兔白霜殘曉月空
鮫宮練出秋風起五雲高閣染宸章最憶吳牋照墨光
明朝驛使江南去詔許千番貢玉堂

五言律

紙

唐李嶠

妙跡蔡侯知芳名古伯馳雲飛錦綺落花發縹紅披舒
卷隨幽顯廉方合軌儀莫驚反掌字當取葛洪規

七言絕句

宮詞

唐王建

千牛仗下放朝初玉案傍邊立起居每日進來金鳳紙
殿頭無事不教書

書樂天紙

唐元稹

金鑾殿裏書殘紙
乞與荊州元判司
不忍拈將等閒用
半封京信半題詩

謝惠紙

唐僧齊己

烘焙幾工成曉雪
輕明百幅疊春冰
何消才子題詩外
分與能書貝葉僧

次韻宋肇惠澄心紙

宋蘇軾

詩老囊空一不留
百番曾作百金收
知君也要雕肝腎
分我江南數斛愁

其二

君家家學陋相如宜與諸儒論石渠古紙無多且分我
自應給札奏新書

從寇生求茶庫紙

宋陳師道

南朝官紙女兒膚玉版雲英比不如乞與此翁元不稱
他年留待大蘇書

扈從上京學宮紀事

元周伯琦

黌舍重開大殿西牙符給事藉金閨唔咿日課繡青簡

揮染還看寫赫蹏

謝靜遠惠紙

元顧瑛

蜀郡金花新著樣
剡谿玉版舊齊名
荷君寄我黔川雪
猶帶漣漪瀉月聲

與唐惟勤索紙

明丘吉

魚網無功補蔡侯
蜀江不洗薛濤愁
教兒昨日繙詩稿
書破芭蕉數幅秋

紙

明毛鈺龍

家住稽山剡水頭陳玄毛穎憶同游榮封楮國金符在
尺素修成五鳳樓

御定佩文齋詠物詩選卷一百八十二

欽定四庫全書薈要卷一萬八千八百五

集部

御定佩文齋詠物詩選卷一百八十三

箋類

五言古

為傅建康詠紅箋

梁江洪

雜彩何足奇
唯紅偏作可
灼爍類藻開
輕明似霞破
縷質卷芳脂
裁花承百和
且傳別離心
復是相思裏
不值情牽人
豈識風流座

七言律

酬崔駙馬惠箋百張兼貽四韻

唐楊巨源

百張雲樣亂花開
七字文頭艷錦回
浮碧空從天上得
殷紅應自日邊來
捧持價重凌雲葉
封裏香深笑海苔
滿篋清光應照眼
欲題風韻愧凡才

襲美以魚箋見寄因謝成篇

唐陸龜蒙

搗成霜粒細鱗鱗
知作豪吟幸見分
向日乍驚新繭色

臨風時辨白萍文好將花下承金粉堪送天邊詠碧雲
見倚小窗親襞染盡圖春色寄夫君

酬魯望見答魚箋之什

唐皮日休

輕如隱起膩如飴除却鮫工解製稀欲寫恐成河伯詔
試裁疑是水仙衣毫端白獺脂猶濕指下水蠶子欲飛
若用莫將閒處去好題春思贈江妃

以剡箋寄贈陳待詔

明陳端

雲母光籠玉楮溫得來元自剡谿瀆清涵天姥峯頭雪

潤帶金庭谷口雲九萬未充王內史百番聊贈杜參軍
從知醉裏縱橫墨不到羊欣白練裙

七言排律

燕枝板浣花牋寄合州徐文職方

宋石介

合州太守髻將絲聞說歡情尚不衰板與歌娘拍新調
牋供狎客寫芳辭木成文理差差動花暎谿光瑟瑟奇

名得只從嘉郡樹

燕枝木
嘉州出

樣傳仍自薛濤時

有薛
濤牋

奇章

磊磊馳聲價江令翩翩落酒卮幾首詩成卷魚子

有魚子牋

誰人唱罷泣燕枝紅牙管好同牀置紫竹笙宜一處施
願助風流向樽席杏花況是未離披

七言絕句

宮詞

唐王建

內人對御疊花箋繡坐移來玉案邊紅蠟光中呈草本
平明昇出閣門宣

酬周秀才

唐施肩吾

三展蜀箋皆郢曲我心珍重甚瓊瑤應緣水府神龍睡
偷得鮫人五色綃

寄溫飛卿箋紙

唐段成式

三十六鱗充使時數番猶得畏相思待將袍襖重鈔了
盡寫襄陽播摺詞

寄弟洎蜀箋

唐韓浦

十樣蠻箋出益州寄來新自浣谿頭老兄得此全無用
助爾添修五鳳樓

贈箋紙呂生

元朱德潤

玉肌勻膩粉初乾
淡淡空青印碧闌
曉日長楊新賦就
墨雲時度玉螭寒

其二

羅文緝緝染湘流
中瑩晴空一段秋
莫問汗青千古事
漆書應讓管城侯

御定佩文齋詠物詩選卷一百八十三

欽定四庫全書蒼要卷一萬八千八百六

集部

御定佩文齋詠物詩選卷一百八十四

畫類

五言古

求崔山人百丈崖瀑布圖

唐李白

百丈素崖裂四山丹巒開龍潭中噴射晝夜生風雷但
見瀑泉落如滾雲漢來聞君寫真圖島嶼備縈迴石黛
刷幽草層青澤古苔幽絨儻相傳何必向天台

瑩禪師房觀山海圖

李白

真僧閉精宇滅跡含達觀
列障圖雲山攢峰入霄漢
丹崖森在目清晝疑捲幔
蓬壺來軒窻瀛海入几案
煙濤爭噴薄島嶼相凌亂
征帆飄空中瀑水灑天半
崢嶸若可陟想像徒盈歎
杳與真心冥遂諧靜者翫
如登赤城裏揭步滄洲畔
即事能娛人從茲得消散

觀江淮名勝圖

唐王昌齡

刻意吟雲山尤知隱淪妙
遠公何為者再詣臨海嶠而

我高其風披圖得遺照援毫無逃境遂展千里眺
淡掃荆門煙明標赤城燒青蔥林間嶺隱見淮海
徼但指香爐頂無聞白猿嘯沙門既云滅獨往豈
殊調感對懷拂衣胡寧事漁釣安期始遺鳥千古
謝榮耀投迹庶可齊滄浪有孤棹

劉相公中書江山畫障

唐岑參

相府徵墨妙揮毫天地窮始知丹青筆能奪造化
功瀟湘在簾間廬壑橫座中忽疑鳳凰池暗與江海
通粉白

湖上雲黛青天際峰晝日恒見月孤帆如有風巖花不
飛落澗草無春冬擔錫香爐緇釣魚滄浪翁如何平津
意尚想塵外蹤富貴心獨輕山林興彌濃喧幽趣頗異
出處事不同請君為蒼生未可追赤松

會稽王處士草堂辟畫衡霍諸山

唐
劉長卿

粉壁衡霍近羣峰如可攀能令堂上客見盡湖南山青
翠數千仞飛來方丈間歸雲無處滅去鳥何時還勝事

日相對主人常獨閒
稍看林壑晚佳氣生重關

畫松

唐元稹

張璪畫古松往往得神骨
翠帚掃春風枯龍戛寒月
流傳畫師輩奇態盡埋沒
纖枝無蕭灑頑榦空突兀
乃悟塵埃心難狀煙霄質
我去浙陽山深山看真物

書鄆陵王主簿所畫折枝

宋蘇軾

論畫以形似見與兒童鄰
賦詩必此詩定非知詩人
詩畫本一律天工與清新
邊鸞雀寫生趙昌花傳神
何如

此兩幅疎淡含精勻誰言一點紅解寄無邊春

次韻魯直書伯時所畫王摩詰 蘇軾

前身陶彭澤後身韋蘇州欲覓王右丞還向五字求詩
人與畫手蘭菊芳春秋又恐兩皆是分身來入流

孫知微畫

宋文同

太古奇偉士精思獨於畫馳心入茫昧萬物赴揮灑當
時一名重顧陸非爾亞卓哉青城筆妙絕冠天下煌煌
九天仗一一若神寫吾恐千載後是終難繼者

孫懷悅畫

文同

孫老抱奇筆臨紙恣揮灑從頭掃亂石礫礫隨墨下焦
頑與圓潤無一不精者誰信萬鈞重卷之不盈把

題畫

宋朱子

青鸞凌風翔飛仙窈窕姿高挹謝塵境妙顏粲瓊蕤登
霞抗玉音結霧吹參差神鈞舞空洞元露湛霄暉山中
玉斧家胡不一來嬉真凡路一分元運千年期

借王嘉叟所藏趙祖文畫孫興公天台賦凝思

幽巖朗詠長川一幅有契於心因作

朱子

翩然乘孤鶴往至蒼崖巔上有桂樹林下有清泠淵洗
心詠太素汎景窺靈詮棲身托歲暮畢此巖中緣

題范寬秋山小景

宋樓鑰

山高最難圖意足不在大尺楮渺千里長江浸橫翠人
家雜煙樹懽悅徒意會苟或森三尺便若俗子對此畫
格律嚴興寄獨超邁洗眼映窓明妙處乃不昧流泉見

原委著屋分向背推車度危橋指路向關隘輕舟最渺
茫浦嶼如有待山稜瘦露骨汀洲橫若帶木葉黃欲脫
秋容儼然在霜餘無片雲歷歷數沙界搜尋目力疲欲
賦無可奈近山才四寸萬象紛納芥欲識無窮意聳翠
更天外

題丁生所藏錢舜舉山水

元 龔 璘

寒谿深無魚扁舟小如履舉世相為浮更用一篙力畫
彼山中人憩此松下石

趙千里小景

元 郭天錫

鸛鵒喧柳陰生鶯樂清泚竹風遞荷氣長夏涼如水王
孫翰墨仙丹青絕紈綺何當著幽人艇子沙頭艤

題高尚書秋山暮靄圖

郭天錫

遠樹含空煙羣峰緘積翠離離鴈外檣落日來天際高
侯丘壑心點墨悟三昧我欲畫滄洲畫長枕蓬睡

為方厓畫山就題

元 倪瓚

摩詰畫山時見山不見畫松雪自纏絡飛鳥亦閒暇我

初學揮染見物皆畫似郊行及城游物物歸畫筭為問
方厓師孰假孰為真墨池挹涓滴寓我無邊春

趙善長山水

元王逢

畫師今趙原東吳諒無雙寸毫九鼎重烏獲力靡扛翠
樹擁羽旂深崦敞雲窗參差見壘竿不無酒盈缸老山
石黃色挿脚琉璃江隱若赤壁壘勢壓曹魏邦何當柔
猛虎蛟鱷遂我降欠伸列仙崖噓咳漁蠻砦

題盛懋畫

元郭鈺

遠島映微紅疎林帶寒綠石上一柴關谿邊兩茅屋輕
風花落地細雨雲歸谷側耳試閒聽疑聞紫芝曲

題蔣廷暉小景

明郭登

我家南山中柴門別經久不知今春來新添幾株柳清
江閒釣竹鷗鷺還來否對此忽相思長歌獨搔首

七言古

附長短句

山水粉圖

唐陳子昂

山圖之白雲兮若巫山之高丘紛羣翠之鴻溶又似蓬

瀛海水之周流信夫人之好道愛雲山以幽求

觀博平王志安少府山水粉壁

唐
李白

粉壁為空天丹青狀江海游雲不知歸日見白鷗在博
平真人王志安沈吟至此願挂冠松谿石磴帶秋色愁
客思歸坐曉寒

同族弟金城尉叔卿燭照山水屏畫歌

李白

高堂粉壁圖蓬瀛
燭前一見滄洲清
洪波洶湧山崢嶸
皎若丹丘隔海望
赤城光中乍喜嵐
氣滅謂逢山陰晴
後雪迴谿碧流寂
無喧又如秦人月
下窺花源了然不
覺清心魂祇將疊
嶂鳴秋猿與君對
此歡未歇放歌行
吟達明發却顧海
客揚雲帆便欲因
之向溟渤

當塗趙炎少府粉圖山水歌 李白

峨嶺高出西極天
羅浮直與南溟連
名公繹思揮彩筆
馳山走海置眼前
滿堂空翠如可掃
赤城霞氣蒼梧煙

洞庭瀟湘意渺綿三江七澤情洄沿驚濤洶湧向何處
孤舟一去迷歸年征帆不動亦不旋飄如隨風落天邊
心搖目斷興難盡幾時可到三山巔西峰崢嶸噴流泉
橫石蹙水波潺潺東崖合沓蔽輕霧深林雜樹空芊綿
此中冥昧失晝夜隱几寂聽無鳴蟬長松之下列羽客
對坐不語南昌仙南昌仙人趙夫子妙年歷落青雲士
訟庭無事羅衆賓杳然如在丹青裏五色粉圖安足珍
真仙可以全吾身若待功成拂衣去武陵桃花笑殺人

奉先劉少府新畫山水障歌

唐杜甫

堂上不合生楓樹怪底江山起煙霧聞君掃却赤縣圖
乘興遣畫滄洲趣畫師亦無數好手不可遇對此融心
神知君重毫素豈但祁岳與鄭虔筆迹遠過楊契丹得
非玄圃裂無乃瀟湘翻悄然坐我天姥下耳邊已似聞
清猿反思前夜風雨急乃是蒲城鬼神入元氣淋漓障
猶濕真宰上訴天應泣野亭春還雜花遠漁翁暝踏孤
舟立滄浪水深青溟濶欹岸側島秋毫末不見湘妃鼓

瑟時至今斑竹臨江活劉侯天機精愛畫入骨髓自有
兩兒郎揮灑亦莫比大兒聰明到能添老樹巔崖裏小
兒心孔開貌得山僧及童子若耶谿雲門寺吾獨胡為
在泥滓青鞵布韉從此始

戲題王宰畫山水圖歌

杜甫

十日畫一水五日畫一石能事不受相促迫王宰始肯
留真跡壯哉崑崙方壺圖挂君高堂之素壁巴陵洞庭
日本東赤岸水與銀河通中有雲氣隨飛龍舟人漁子

入浦澈山木盡亞洪濤風尤工遠勢古莫比咫尺應須
論萬里焉得并州快剪刀剪取吳松半江水

觀于舍人辟畫山水

唐王季友

野人宿在山家少朝見此山謂山曉半辟能棲嶺上雲
開簾欲放湖中鳥獨坐長松是阿誰再三招手起來遲
于公大笑向余說小弟丹青能爾為

辭諸畫連句柏梁體

唐闕名

吳生畫勇正戟攢出變奇勢千萬端蒼蒼鬼怪層辟寬

覩之恩恩毛髮寒稜伽之力所疲殫李真周昉優劣難
活禽生卉推邊鸞花房嫩彩猶未乾韓幹變態如激湍
惜者畫壁勢未殫後人新畫何汗漫

趙令晏崔白大圖幅徑三丈

宋蘇軾

扶桑大繭如甕盎天女織綃雲漢上往來不遣鳳銜梭
誰能鼓臂投三丈人間刀尺不敢裁丹青付與濠梁崔
風蒲半折寒鴈起竹間的皪橫江梅畫堂粉壁翻雲幕
十里江天無處著好卧元龍百尺樓笑看江水拍天流

李思訓畫長江絕島圖

蘇軾

山蒼蒼江茫茫小孤大孤江中央
崖摧路絕猿鳥去惟有喬木攬
天長客舟何處來櫂歌中流聲
抑揚沙平風軟望不到孤山久
與船低昂峨峨兩煙鬟曉鏡開
新妝舟中賈客莫漫狂小姑前
年嫁彭郎

晚秋煙波圖

宋文同

直于一丈素寫盡千里景雲山
杳杳已成秋煙水漻漻方入暝
君應無心得此畫我豈有言能
爾詠

題商德符學士桃源春曉圖

元 趙孟頫

宿雲初散青山濕
落紅繽紛流水急
桃花源裏得春多
洞口春煙搖綠蘿
綠蘿搖煙挂絕壁
飛流直下三千尺
瑤草離離滿澗阿
長松落落凌空碧
雞鳴犬吠自成邨
居人至老不相識
瀛洲仙客知仙路
點染丹青寄輕素
何處有山如此圖
移家欲向山中住

高尚書夜山圖

元 鮮于樞

世人看山在山下
李侯看山向絕頂
世人畫山畫白日

高侯畫山摹夜景絕頂看山山更奇夜景摹出人少知
遠山蒼蒼近山黑巖樹歷歷汀樹微天高露下暮潮息
月明一片寒江遲藏深樂淵潛驚定安林棲耳絕城市
喧心息聲利機古人無因駐清景高侯有筆能奪移容
翁復作有聲畫冥搜天巧為補遺後來知有李侯之德
高侯畫千年人誦容公詩

李思訓妙筆

元 鄧文原

李侯丹青勝結綠貝闕珠宮看不足偶研丹碧寫春山

萬壑千峰僅盈幅應知深處有神仙
花落花開度歲年
扁舟自是尋真侶為覓桃源一洞天

王摩詰春谿捕魚圖

鄧文原

輞川之景天下奇我昔曾聞不相識
若人筆端幹元氣
萬頃煙濤歸咫尺漁翁生事浩無窮
醉挹青藍洗胸臆
或披蓑笠卧寒蟾或倚孤篷蘸空碧
靜觀此理良可娛
應須仰慕王摩詰

寫廬山圖上

元虞集

憶昔繫船桑落洲，洲前五老當船頭。
風吹雲氣迷谷起，霜墮楓葉令人愁。
高人在第九疊，太白一去三千秋。
石橋二客如有待，裹茶試泉春巖幽。

題華岳江城圖

元楊載

華岳能詩世有名，學畫丹青亦豪放。
此圖似寫安慶城，雉堞樓臺儼相向。
北風將至江面黑，千艘萬艘爭避匿。
滄溟涌溢水倒流，南嶽動搖天柱側。
蛟龍戲落秋潭底，素練平鋪八千里。
時清好作釣魚翁，閒弄輕舟煙霧裏。

吳真人京館畫壁

元 薩都拉

硯池花落丹水香步虛白日聲琅琅江南道士愛瀟灑
新粉素壁如秋霜王郎酒酣衫袖濕醉眼朦朧電光急
元龍雲重雨脚斜白兔秋高月中泣倦游借榻日觀東
恍惚夜夢三湘中鷓鴣聲斷江路遠青林雨暗春濛濛
題趙文敏木石有先師題於上

元 張翥

吳興筆法妙天下人藏片楮無遺者南陽詩律動江湖

一篇才出人爭寫二老風流傾一時只今傳畫仍傳詩
清涵月露秋見影黑入雷雨寒無姿仇山黃鶴去不返
苔谿鷗保歲俱晚好呼鐵爪夜錚錚刻向青珉照人眼

題山水圖

元
貢師泰

前山後山雲亂起山脚入谿清見底谿南更有山外山
散如浮塵聚如米老楓枯櫟葉紛紛下有人家深閉門
釣絲欲收風浪急却回雙艇來籬根老翁曳杖行偃僂
一童負樵一童斧筆端意度盡神妙卷裏衣冠自淳古

商周寂寞經幾秦後來莘渭寧無人
茫茫耕釣去不已
武陵竟隔桃花春

題江陰丘文中山水圖

貢師泰

老龍渴飲池中墨飛上半天成崩
劣雲煙著地凝不開
白晝神驅太陰黑筆端巧奪造化功
咫尺峰巒千萬重
長林似灑楓葉雨虛亭不動松花風
隔江更有山無數
江上扁舟纔半渡他年白髮許重來
為君別寫容城賦

題雲西畫卷

元
吳鎮

雲西老人清且奇隨意點筆自合詩高尚不趨車轍跡
新圖不讓虎頭癡谿中有人空佇立江上征帆歸去遲
何處谿歌聲欸乃碧雲疎樹晚離離

題秋山風雨圖

元郭鈺

平生最愛米家畫君之此圖妙天下鳥分歸路雲不開
樹壓懸崖雨如瀉倚江茅屋何人住蘆竹蕭蕭出無路
似我還山煙雨中閒來只讀秋陽賦

題碧山圖

元趙沆

嘗愛李太白興來棲碧山中別有一天地惜無圖畫
留人間誰為碧澄翁久向山中住栽花種柳待春風忽
見新圖識其趣青山淡淡雲離離小橋流水涵清漪抱
琴揮勝可終日安得似汝圖中時韓侯好詩仍好畫嗜
酒不憂官長怪欲圖李白碧山居酒禁方嚴筆如借知
翁有子舊曾遊澹泊無營心日休圖成漫與翁為壽願
翁長樂無虞憂

趙千里夜潮圖

明
王冕

去年夜渡西陵關待渡兀立江上灘灘頭潮來倒雪屋
海面月出行金盤冰花著人如撒霰過耳斜風快如箭
叫霜鴻鴈零亂飛正似今年畫中見寒煙漠漠天冥冥
展玩陡覺心神清便欲吹簫騎大鯨去看海上三山青

劉松年畫

明高啓

樵青刺篙勝搖槳船頭分流水聲響青山淼淼波漾漾
白鷗飛過時一兩載書百卷酒十壺日斜出遊女兒湖
鄰舟買得巨口鱸醉拍銅斗歌嗚嗚此樂除却江南無

題桶底仙山圖

明顧祿

昔人夜投逆旅中戲將指爪呈神工
颼颼逸響如飄風
桶底刻出蓬萊宮狀如六鼇擁虛空
戴山出沒滄溟東
瓊臺瑤闕知幾重千門萬戶遙相通
儼然中坐一老翁
星眸霞臉冰雪容羣真左右來相從
或翳白鳳騎青龍
女仙七十如花紅各執樂器笙與鏞
鈞天一曲奏未終
雙成勸酒琉璃鍾谷神長生壽無窮
出入造化超鴻濛
我欲上天躡紫虹高步去逐東王公

題趙原臨高尚書山水小幀

明張適

有元畫山誰第一燕都獨數高尚書盛名不在吳興下
米虎用墨渾無殊江南趙原最晚出蓄得高宰留真跡
行披坐閱無暫停肯綮皆將飽胷臆貌此小幀雲山圖
萬里不盡黑模糊綠樹人家春晝晚當門縹緲風煙湖
儼與前朝合作符何啻襖帖唐鉤摹黃庭畫贊雖小字
位置春容大無異平原一變為穹碑任筆縱橫亦適意
趙卿得此變化筆知爾當今盡無敵酒酣試倒金壺汁

元氣淋漓神鬼泣趙卿趙卿誠莫當我有古紙久矣藏
幾時邀君吸百觴為我乘興揮毫芒使人復覩尚書郎
高堂素壁生輝光

題王叔明墨竹為鄭叔度賦

明

方孝孺

吳下王蒙藝且文吳興趙公之外孫黃塵飄蕩今白髮
典刑遠矣風流存華亭朱芾稱善畫每觀蒙畫必歎詫
謂言妙處逼古人世俗相傳倍增價昔年夜到南屏山
高堂素壁五月寒壁間舉目見修竹煙雨冥漠蛟龍蟠

呼童秉燭久不寐細看醉墨王蒙字固知蒙也好天趣
畫師豈解知其意分枝綴葉人所知要外枝葉求神奇
天機貴足不貴似此事不可傳諸師麟谿鄭君好奇士
愛畫猶能賞其趣於乎世間作者非不多鄭君甚少可
奈何

題畫

明
于謙

江邨昨夜西風起木葉蕭蕭墮江水水邊蘋蓼正開花
妝點秋容畫圖裏小舟一葉弄滄浪釣得鱸魚酒正香

醉後狂歌驚宿鴈蘆花兩岸月蒼蒼

題鍾馗圖

明凌雲翰

湖風吹沙目欲眯官柳搖金梅綻蕊終南進士倨然起
帶束藍袍靴露趾手掣硬黃書一紙若曰上帝錫爾祉
蜎磔于思含老齒頤指守門荼與壘肯放妖狐搖九尾
一聲爆竹人盡靡明日春光萬餘里

謝孔昭臨黃大癡畫

明吳寬

大癡道人避世士移家舊隱虞山裏早年能畫老入神

落筆虞山宛相似深林依稀邨塢重水口近與昆湖通
高岡硤礪勢欲墮此老前身黃石公百年以後誰其亞
昔者吳門稱老謝案頭臨畫似臨書咄咄逼人真可詫
風流前輩香難攀謔語空傳謝疊山窻中遠岫依然在
天際春雲仍自還

題高房山山水

吳寬

燕南蹙翠維房山高公昔者生其間戲拈畫筆少明豁
玉女峰亞垂煙鬟積雨初收隔春樹望見人家塢邊住

亦知中有王維詩行到水窮無覓處

沈石田追倣黃大癡長卷為林御史舜舉題

吳寬

大癡道人顧長康平生癡絕仍畫絕長卷當年我亦觀
大略猶能為人說山川歷歷百里開彷彿扁舟適吳越
平林曲岸客共游複嶂重湖天所設漁工樵子互出沒
定有高人在巖穴墨瀦淋漓拾未能信得畫家山水訣
為人說此亦徒然把筆安能指下傳對本臨摹未為苦

運思想像誰能專
晴窻設色手自改
輸與吾鄉沈石田

題安城彭學士山水圖

明程敏政

何人結屋青山裏
終日開窻見山喜
近峰錯落走簷牙
遠岫蜿蜒挿天嘴
澄江一道山前過
短棹平分浪痕破
船頭水氣綠侵衣
載酒高人面山坐
石泉下衝沙渚渾
桑榆接地成深邨
柴扉欲扣不可到
或有細路通雲根
竹鶴老人名畫手
半幅生綃大于斗
水分山斷意無窮
日送飛鴻度江口
安城先生塵慮脫
南望鄉人楚天濶

高堂永日對山歌蕭蕭涼風起蘋末

題杜東原先生雨景

明 沈 周

老原作畫墨法熟紙上沈沈潑墨綠重林濕葉欲墮地
合礪流淙似鳴玉廬山九疊翠不乾秋影平吞此長幅
借看真怕雨拂面要為詩人洗雙目滕王珠簾正堪卷
董家破屋不可宿出門一笑青天高猶怪春泥汙吾足

唐寅畫山水歌

明 祝允明

杜陵一匹好東絹韋郎上植松兩榦唐寅今如曹不興

有客乞染淞江綾前山如笑後如怒疎林如雨密如霧
黯黯渾疑隔千里蜿蜒忽辨緣谿路黑雲沍蒼厓丹霞
標赤城壯哉畫工力九州通尺屏兩崖遠立翬兩角一
道空江浸寥廓吳綾本自淞水剪誰把溜澠辨清濁茅
齋傍江絕低小羨爾高居長自好今年吳地幾魚鼈看
畫覺轉心熱惱黃金壺中一斗汁我欲濡毫映手濕莫
教童子誤攘翻忽使癡龍攜雨出

五言律

題襄陽圖

唐 徐安貞

畫得襄陽郡依然見昔遊
峴山思駐馬漢水憶回舟
丹壑常含霽青林不換秋
圖書空咫尺千里意悠悠

題玄武禪師屋壁

唐 杜甫

何年顧虎頭滿壁畫滄洲
赤日石林氣青天江海流
錫飛常近鶴杯渡不驚鷗
似得廬山路真隨惠遠遊

觀李固請司馬弟山水圖

杜甫

簡易高人意匡牀竹火爐
寒天留遠客碧海挂新圖
雖

對連山好貪看絕島孤羣仙不愁思冉冉下蓬壺

其二

方丈渾連水天台總映雲人間常見畫老去恨空聞范
蠡舟偏小王喬鶴不羣此生隨萬物何路出塵氛

其三

高浪垂翻屋奔崖欲壓牀野橋分子細沙岸繞微茫紅
浸珊瑚短青懸薜荔長浮查並坐得仙老暫相將

嚴公廳宴同詠蜀道畫圖

杜甫

日臨公館靜畫列地圖雄劒閣星橋北松州雪嶺東華
彞山不斷吳蜀水相通興興煙霞會清樽幸不空

題山水障子

唐張祜

一見秋山色方憐畫手稀波濤連壁動雲物下簷飛嶺
樹冬猶發江帆暮不歸端然是漁父相向日依依

題王右丞山水障子

張祜

精華在筆端咫尺匠心難日月中堂見江湖滿座看夜
凝嵐氣濕秋浸壁光寒料得昔人意平生詩思殘

綿州中丞以江山小圖遠垂賜及無寄詩

唐李朋

巴江與雪山并邑共回環圖寫丹青內分明煙靄間移
居名郡邑助我小齋閒日想登臨處高蹤不可攀

陳式水墨山水

唐方干

造化有功力平分歸筆端谿如冰後聽山似燒來看立
意雲髯出支頤煙汗乾世間從爾後應覺致名難

余嘗有雪景一絕為人所諷吟段贊善小筆精

微忽為圖畫以詩謝之

唐鄭谷

贊善賢相後家藏名畫多留心於繪素得意在煙波屬
興同吟詠成功更琢磨愛余風雪句幽絕寫漁蓑

宋復古畫瀟湘晚景圖

宋蘇軾

西征憶南國堂上畫瀟湘照眼雲山出浮空野水長舊
游心自省信手筆都忘會有衡陽客來看意渺茫
心老久許為作畫未果以詩督之

宋陳與義

布納王摩詰禪餘寄筆端試將能事迫肯作畫工難秋
入無聲句山連欲雨寒平生夢想處奉乞小巔岬

贈畫工

宋 裴萬頃

綵筆三生夢春蓮萬葉花笑人為市道隨分足生涯山
路淨如水谿流淺見沙能來良不惡看爾傲煙霞

米元暉雲山短卷

元 鄧文原

芳草孤舟渡幽居一徑通江湖春雨外墟里暮煙中機
息鷗先下花飛水自東臨流無限意畫史若為工

殘畫

元楊載

破裂無邊幅，華堂棄置餘。
蒼松深踞地，白鶴上凌虛。
風格猶森若，丹青總翳如。
苦心絕人事，誰見用功初。

趙道士山水圖

元揭傒斯

悄愴寒山曉，淒迷野水昏。
長橋通古寺，小艇背衡門。
路盡雙松上，雲生亂石根。
如行南嶽暮，遙見祝融尊。

殘畫

元薩都拉

勝境不可得，生綃餘舊圖。
丹青初彷彿，塵土半模糊。
蝴

蝶飛疑去波濤折轉無良工今豈少為爾一長吁

桃源圖

元 傅若金

聞說避秦地花間忘歲年偶逢漁父問長使世人傳丘壑渾疑幻林廬或近仙至今圖畫裏時憶武陵船

閻立本西嶺春雲

元 吳 鎮

西山高五臺縹緲出蓬萊春半花爭發宵征客倦來短橋流曲水危壁覆蒼苔宣廟曾留賞臨風媿匪材

李昭道畫卷

吳 鎮

人愛山居好何如此際便家規仍小異幽致更超然暮
靄映高樹柴扉遶細泉新圖不可再展閱憶唐賢

子久為危太樸畫

吳鎮

子久丹青好新圖更擅長浮空煙水闊倚岸樹陰涼
咫尺分濃淡高深見渺茫知君珍重意愈久豈能忘

王晉卿萬壑秋雲圖

元黃公望

雨霽雲仍碧天高氣且清霜楓紅欲盡澗瀑落長鳴岫
嶺蒼茫景江湖浩蕩情應知卧雲者奚尚避秦名

題袁清容長幅

黃公望

入山眺奇壑幽致探何窮一水青岑外千巖綺照中蕭
森凌雜樹燦爛映丹楓有客茅茨裏居然隱者風

顧愷之秋江晴嶂圖

黃公望

三絕如君少斯圖更擅長設施無斧鑿點染自微茫山
碧林光淨江清秋氣涼憐余瞻對久疑入白雲鄉

題米芾小景

元楊維禎

煙霧林梢出蒼翠望中分山溜雜人語谿雲亂鶴羣石

梁逢釋子巖屋隱微君皴皴誰家筆披圖有篆文

題畫

元 鄭允端

誰貌江南景風煙萬里寬金銀開佛寺紫翠出林巒遠
客馳行役幽人賦考槃蒼茫無限意撫卷為盤桓

書雲林畫林亭遠岫

明 呂敏

憶過梁谿宅于今向廿年賦詩清悶閣試茗惠山泉夜
雨牽離夢春雲黯遠天鄉情與客思看畫共茫然

題馬文璧畫

明 貝瓊

小橋危跨壑破屋幸依山避地人相過朝天客未還麝
眠春草外猿挂古松間寂寞南窗日殘書亦久閒

題姚公綬山水

明張寧

幽意寫不盡萬山深更深白雲無出處綠樹漫成林啼
鳥醒人夢流泉淨客心何當隨釣艇看奕草堂陰

題蘇子瞻遊赤壁圖

明何景明

垂老黃州客高秋赤壁船三分留古跡兩賦到今傳落
日寒江動青天斷岸懸畫圖誰省識千載尚雲煙

五言排律

奉和李右相書壁畫山水

唐孫逖

廟堂多暇日山水契中情
欲寫高深趣還因藻繪成
九江臨戶牖三峽遶檐楹
花柳窮年發煙雲逐意生
能令萬里近不覺四時行
氣染荀香馥光含樂鏡清
詠歌齊出處圖畫表冲盈
自保千年遇何論八載榮

奉觀嚴鄭公廳事岷山沱江畫圖十韻

唐杜甫

池水臨中座岷山到北堂
白波吹粉壁青嶂插雕梁
直訝杉松冷無疑菱荇香
雪雲虛點綴沙草得微茫
嶺鴈隨毫末川蜺飲練光
霏紅洲藥亂拂黛石蘿長
暗谷非關雨丹楓不為霜
秋成玄圃外景物洞庭傍
繪事功殊絕幽襟興激昂
從來謝太傅丘壑道難忘

府試觀開元皇帝東封圖

唐馬戴

儼若翠華舉登封圖乍開
冕旒明主立冠劍侍臣陪
迹類飛仙去光同拜日來
粉痕疑檢玉黛色訝生苔
挂壁

雲將起凌風仗若迴何年復東幸魯叟望悠哉

七言律

南省轉牒欲具注國圖今盡通風俗故事

唐
柳宗元

聖代提封盡海隅狼荒猶得紀山川華彝圖上應初錄
風土紀中殊未傳椎髻老人難借問黃茅深峒敢留連
南宮有意求遺俗試檢周書王會篇

贈寫御真李長史

唐
李 遠

玉座煙銷硯水清
龍髯不動彩毫輕
初分隆準山河秀
再點重瞳日月明
宮女捲簾皆暗認
侍臣開殿盡遙驚
三朝供奉應無敵
始覺僧繇浪得名

觀項信水墨畫

唐

方干

險峭雖從筆下成
精能皆自意中生
倚雲孤檜知無朽
挂壁高泉似有聲
轉扇驚波連岸動
迴燈落日向山明
小年師祖今過祖
異域應傳項信名

項洙處士畫水墨釣臺

方干

畫石畫松無兩般猶嫌瀑布畫聲難雖云智慧生靈府
要且工夫在筆端潑處便連陰洞黑添來先向朽枝乾
我家曾寄雙臺下往往開圖盡日看

水墨松石

方干

三世精能舉世無筆端狼籍見工夫添來勢逸陰崖黑
潑處痕輕灌木枯垂地寒雲吞大漠過江春雨入全吳
蘭堂坐久心彌惑不道山川是畫圖

送醉畫王處士

唐李洞

幾年乘興住南吳，狂醉蘭舟夜落湖。
別後鶴毛描轉細，近來牛角飲還麤。
同餐夏果山何處，共釣秋濤石在無。
闕下相逢怪予老，篇章役思繞寰區。

扇上畫牡丹

唐羅隱

為愛紅芳滿砌階，教人扇上畫將來。
葉隨綵筆參差長，花逐輕風次第開。
閒挂幾曾停蛺蝶，頻搖不怕落莓苔。
根生無地如仙桂，疑是嫦娥月裏栽。

李伯時畫其弟亮功舊隱宅圖

宋
蘇軾

樂天早退今安有摩詰長閒古亦無五畝自栽池上竹
十年空看輞川圖近聞陶令開三徑應許揚雄寄一區
晚歲與君同活計如雲鶩鴨散平湖

題顧善夫所藏張僧繇畫翠嶂瑤林圖

元
鄧文原

善夫夙有耽奇癖珍秘何須羨賈胡微廟未銷當日字
僧繇仍見昔年圖千林歷落人煙密萬里縈迴鳥道孤

幾欲臨風試題句恍疑身世在冰壺

劉松年春山仙隱圖

鄧文原

綠柳疎花遶舍栽長松灌木覆亭臺雲巒倒影水天負
蒲葦有聲山雨來內史幽情觴詠樂右丞別業畫圖開
何時許我遊真境野色橋邊踏紫苔

吳道玄五雲樓閣圖

鄧文原

觀閣嵯峨起日邊春雲靉靆倚層巔天低青海一杯水
山落齊州九點煙百尺長松神闕外千秋靈柏古壇前

遨遊盡是蓬山侶
瑤草金芝不記年

王維秋林晚岫圖

鄧文原

千峰凝翠宛神州
中有仙人寤寐遊
林麓漸看紅葉暮
風煙俄入野塘秋
搖搖小艇尋谿轉
寂寂雙扉向晚投
我欲探幽未能去
畫中真境許誰儔

題洪谷子楚山秋晚圖

鄧文原

舊知洪谷古先儔
五尺橫圖見十洲
千嶂排空青玉立
一江流水白雲浮
琤簷共話當年雨
丹葉誰憐滿徑秋

最是無聲詩思好恍然身在赤城遊

趙千里山水長幅

鄧文原

蒼山高處白雲浮樓閣參差帶遠洲千尺虬龍依絕壁
一羣鸛鶴唳清秋山翁有約憑雙屐野客無心溯碧舟
自是霜林好風景居然尺五見丹丘

子昂秋山圖

元虞集

翁昔少年初畫山丹楓黃竹雜潺湲直疑積雨得深潤
不假浮雲相往還世外空青秋一色窻中遠黛曉千鬟

瀛洲雞犬同人境尚想翁歸向此間

題胡虔汲水蕃部圖應制

元 揭傒斯

沙磧茫茫塞草平沙泉下馬滿囊盛曾于王會圖中見
真向天山雪外行聖德只今包宇宙邊庭隨處樂農耕
生綃半幅唐人筆留與君王駐遠情

陸探微員嶠仙游

元 吳 鎮

梅閣重重翠遶遮時時雲氣貼平沙千峰樹色藏朝雨
百道江聲送晚霞洞古數留仙子蹟谿迴深護羽人家

遨遊每憶無塵地
咫尺仍堪閱歲華

顧愷之秋江晴嶂

吳鎮

從來六法重長康
染得新圖更鬱蒼
萬頃遠橫秋鏡闊
千重林立彩雲長
邛邛雞犬鳴晴晝
兩兩漁樵話夕陽
無限風煙誰得似
欲將此處付行藏

黃荃蜀江秋淨圖

吳鎮

暮煙漠漠一江秋
疎樹依稀見遠舟
風度鐘聲來古寺
人隨鴈影過前洲
雲銷碧落天無際
波撼蒼山地欲浮

應識箇中清絕處成都畫史筆端收

郭忠恕仙峰春色

吳鎮

層軒繚繞綠雲堆坐挹空青落鳳臺一石負黿三島去
九峰騎鶴衆仙來越南翡翠無時見洞口薔薇幾度開
春去春來花木好谿頭時聽棹歌迴

李咸熙秋嵐凝翠

吳鎮

雨過秋光映翠微巖雲一抹澹荆扉千山寂寂疎鐘杳
萬壑蕭蕭落木稀澗水奔飛行路濕松篁迴合野禽歸

征帆點點滄江上應羨山人種薜薇

王晉卿畫

吳鎮

晉卿繪事誠無匹尺素能參造化功
碧樹依微煙水闊
蒼山縹緲暮雲籠幽深自覺塵氛遠
閒澹從教色相空
更喜涪翁遺墨好草堂何必獨稱工

叔明松壑秋雲圖

吳鎮

萬壑潏洄磴道長崇岡交互轉蒼蒼
疎松過雨虛闌淨
古木迴風曲岸涼
邨舍幾家門半落
漁梁何處水流香

扁舟凝望雲千頃不覺西林下夕陽

方壺松巖蕭寺

吳鎮

方壺終日瘴煙霞寫得湖山事事嘉
湖上煙籠梵王宅
山深雲覆羽人家
詩翁佇立搜新句
稚子閒來掃落花
幾處歸帆何處客
一聲啼鳥夕陽斜

題關仝層巒秋靄圖

元黃公望

羣峰矗矗暮雲連
羅磴逶迤鳥道懸
落葉深深門半掩
疎花歷歷客猶眠
巖端飛瀑為青雨
江上歸舟溯碧煙

應識箇中奇絕處昔年洪谷屬君傳

李成寒林圖

黃公望

六法從來推顧陸一生今始見營丘腕中筋骨元來鐵
世上江山盡入眸林影有風摧落葉澗聲無雨咽清流
蹇驢騷客吟成未萬壑寒雲為爾留

題孟珍玉澗畫岳陽小景

元 楊維禎

岳陽樓上望君山山色蒼涼十二鬟
劒氣拂雲連翠黛珮聲挑月過滄灣
洞庭水落漁船上雲夢秋深獵客還

最憶老仙吹鐵笛
馭風時復往來間

為曹僉事畫谿山春曉圖因題

元倪瓚

荆谿之水清漣漪
谿上晴嵐紫翠圍
連舸載書煙渚泊
提壺入林春蕨肥
身遠雲霄作幽夢
手栽花竹映山扉
磯頭雪影多鷗鷺
也著狂夫一浣衣

題趙仲穆秋山圖

明錢宰

人家水檻接山窻
好在江南山水邦
兩岸雲林皆落日

一天鳬鴈共秋江屋頭數遍青巒九松下吟成白石雙
野服何人正蕭散泊船歸醉酒盈缸

水邨圖

明
沈周

魚莊蟹舍一叢叢湖上成邨似畫中互渚斷沙橋自貫
輕鷗遠水地俱空船迷楊柳人依綠燈隔蕪葭火映紅
全與吾家風致合草堂曾有此愚翁

為蘇太守題畫

沈周

疊疊青山宛宛谿林蹊曲折世途迷雲邊石壁花漫縫

畚後春田雨夾泥
趁屋牆斜鄰舍逼
當門樹密鳥巢低
鳴騶入谷人今起
惟有圖書積舊樓

題畫

明唐寅

湖上仙山隔渺茫
世塵不上渡頭航
白蘋開處藏漁市
紅葉中間放鹿場
落日沈沙曾有影
新霜著樹橘生香
遙聞逋老經行處
芝草歲蕤滿路傍

五言絕句

題天柱山圖

唐戴叔倫

拔翠五雲中擎天不計功誰能凌絕頂看取日升東

書劉景文所藏宗少文一筆畫

宋蘇軾

宛轉回文錦紫盈連理花何須郭忠恕匹素畫綠車

畫齋

宋文同

試品齋中畫曾無第二流頑礪與亂篠應挂在當頭

觀祝孝友畫卷

宋朱子

草閣臨無地江空秋月寒亦知奇絕景未必要人看

題可老所藏徐明叔畫卷

朱子

羣峰相接連斷處秋雲起雲起山更深咫尺看千里

題畫卷小山

朱子

飛來小坡陀未雨已滂溥荒此定何人蘇公有遺記

吳畫

朱子

妙絕吳生筆飛揚信有神羣仙不愁思步步出風塵

范寬畫

朱子

山雄雲氣深樹老風霜勁下有考槃人超遙得真性

題扇上畫

元 陳深

古木排山立幽窻傍水開直疑林處士獨櫂小舟回

跋畫歸去來辭

元 吳澄

當時歸去意難與世人知未信千年後心期有畫師

趙彥敬越山圖

元 趙孟頫

越山隔濤江風起不可渡時于圖中看居然在煙霧

種筆亭題畫

元 高克恭

積雨暗林屋晚峰晴露巔扁舟入蘋渚浮動一谿煙

王叔明林泉清話圖

元 吳 鎮

落日秋山外霜林暮靄中相看無俗處生事有誰同

題宣和畫卷

元 丁 復

澹意芙蓉外閒情翡翠邊波翻太液水分送向南船

秋江晚渡圖

元 楊維禎

船泊大江口行人與馬爭不如漁艇子高卧待潮平

題胡廷暉畫

元 郊 韶

仙館空青裏春船罨畫中鷗波千丈雪漁笛一絲風

雜畫

明孫一元

夕陽沒中流舟子不停櫓風來未滿帆望斷桃花浦

六言絕句

題孤山放鶴圖

元趙孟頫

昔年曾到孤山蒼藤古木高寒想見先生風致畫圖留
與人看

題危太樸雲林圖

元丁復

天台萬八千丈雲林三十六峰幾載山中獨憶今朝江

上相逢

題畫

元 徐有貞

山路只通樵客江邨半是漁家秋水磯邊落鴈夕陽影裏飛鴉

七言絕句

巫山枕障

唐 李白

巫山枕障畫高丘白帝城邊樹色秋朝雲夜入無行處
巴水橫天更不流

題禮上人壁畫山水

唐錢起

連山畫出映禪扉
粉壁香筵滿翠微
坐來爐氣縈空散
共指晴雲向嶺歸

畫石

唐劉商

蒼蘚千年粉繪傳
堅貞一片色猶全
那知忽遇非常用
不把分銖補上天

畫樹後呈澹師

劉商

翔鳳邊風十月寒
蒼山古木更摧殘
為君壁上畫松柏

勁雪嚴霜君試看

將至韶州先寄張端公使君借圖經

唐韓愈

曲江山水聞來久恐不知名訪倍難願借圖經將入界
每逢佳處便開看

朝天詞

唐王建

威容難畫改頻頻眉目分毫恐不真有詔別圖書閣上
先教粉壁定風神

畫木蓮花圖寄元郎中

唐白居易

花房膩似紅蓮朶
艷色鮮如紫牡丹
唯有詩人應解愛
丹青寫出與君看

觀葉生畫花

唐施肩吾

心竅玲瓏貌亦奇
榮枯只在手中移
今朝故向霜天裏
點破繁花四五枝

題畫建谿圖

唐方干

六幅輕綃畫建谿
刺桐花下路高低
分明記得曾行處

只欠猿聲與鳥啼

海棠圖

唐崔塗

海棠花底三年客
不見海棠花盛開
却向江南見圖畫
始慙虛到蜀城來

傳經院壁畫松

唐鄭谷

危根瘦蓋聳孤峰
珍重江僧好筆蹤
得向遊人多處畫
却勝澗底作真松

金陵圖

唐韋莊

誰謂關情畫不成
畫人心逐世人情
君看六幅南朝事
老木寒雲滿故城

僧有示西湖墨本者為畫林山人隱居詩以酬之

宋林逋

泉石年來偶結廬
冷挨松雪瞰西湖
高僧好事仍多藝
已共孤山入畫圖

和韻

林逋

表裏湖山極目春
據鞍時此避埃塵
蒼蒼煙樹悠悠水

除却王維少畫人

書李世南所畫秋景

宋蘇軾

野水參差落漲痕，疎林欹倒出霜根。
扁舟一櫂歸何處，家在江南黃葉邨。

書林次中所得李伯時歸去來陽關二圖後

蘇軾

不見何戡唱渭城，舊人空數米嘉榮。
龍眠獨識慙慙處，畫出陽關意外聲。

其二

兩本新圖墨寶香樽前獨唱小秦王為君翻作歸來引
不學陽關空斷腸

郭熙秋山平遠

蘇軾

目盡孤鴻落照邊遙知風雨不同川此間有句無人識
送與襄陽孟浩然

陳季常所畜朱陳邨嫁娶圖

蘇軾

何年顧陸丹青手畫作朱陳嫁娶圖聞道一邨唯兩姓

不將門戶買崔盧

王晉卿所藏著色山

蘇軾

葦確何人似退之意行無路欲從誰宿雲解駁晨光漏
獨見山紅澗碧時

次韻子由書王晉卿畫山水

蘇軾

山人昔與雲俱出俗駕今隨水不回賴我胃中有佳處
一尊時對畫圖開

題王晉卿畫後

蘇軾

醜石半蹲山下虎長松倒卧水中龍試君眼力看多少
數到雲峰第幾重

題毛女真

蘇軾

霧鬢風鬟木葉衣山川良是昔人非祇因閒過商顏老
獨自吹簫月下歸

申應時尋山圖

宋沈與求

王維買宅先成畫申子尋山亦載圖他日真能營小築
此山佳處著儂無

戲題畫卷

宋程俱

五載京塵白鬢鬚
丹青遐想寄衡巫
如今掃迹長林下
却對真山看畫圖

其二

胷中雲夢本無窮
合是人間老畫工
常恨無因繼三絕
倩人拈筆寫胷中

題嚴居厚谿莊圖

宋朱子

平生生涯一短篷
只今回首畫圖中
平章箇裏無窮事

要見三山老放翁

奉題李彥中所藏俞侯墨戲 朱子

不是胷中飽丘壑誰能筆下吐雲煙故應祇有王摩詰
解寫離騷極目天

辟間古畫精絕未聞有賞音者 朱子

老木樛枝入太陰蒼崖寒水斷追尋千年粉壁塵埃底
應識良工獨苦心

題畫卷

宋 范成大

鑿落秋江水石明高風老柳兩灘橫君看疊巘雲容變
又有中宵雨意生

其二

歌傾棧路遶山明隔隴人家犬吠聲無限白雲堆去路
不知誰識許宣平

題趙幹江行夜雪圖

宋
李彌遜

瓜步西頭水拍天白鷗波上寄長年箇中認得江南手
十里黃蘆雪打船

觀宗室曹夫人畫

宋僧道潛

臨平山下藕花洲旁引官河一帶流雨棹風帆有無處
筆端須與細冥搜

漁邨詩畫圖

金党懷英

江邨清境皆畫本畫裏更傳詩語工漁父自醒還自醉
不知身在畫圖中

雅集圖

金劉祖謙

翠雀翩翩野鶴孤玉京人物會仙圖後來且莫輕題品

席上揮毫有大蘇

千里江山圖

金李俊民

筆下江山取意成一峰未盡一峰生憑誰試向行人問
水郭煙邨第幾程

題扇

元袁易

飛燕驚鴻擬未真飄飄直欲似行雲入舟山色羞眉黛
隔岸榴花避舞裙

趙子昂陳仲美合作水見小景

元 仇 遠

良工苦思可心降底事文禽不解雙欲采芳華波浪濶
芙蓉朶朶隔秋江

題山水卷

元 錢 選

胃中得酒出孱顏木葉森森歲暮殘落墨不隨嵐氣暝
幾重山色幾重瀾

題趙子昂為袁清容畫春景仿小李

元 鄧文原

王孫久別同朝侶，為寫晴雲百疊峰。
挂起碧窗凝望處，畫中今喜故人逢。

王洽雲山圖

鄧文原

五雲深處擁蓬萊，樹色蒼涼映水開。
何處書聲映林樾，却教仙侶過橋來。

題趙子固水仙圖

元張伯淳

裊長帶裊寒偏耐，玉質金相密更奇。
見畫如花花似畫，西興渡口晚晴時。

皇甫松竹梅圖

張伯淳

三友亭亭歲晚時
政緣冷淡易相知
何須近舍今皇甫
却向圖中覓補之

題米南宮像

元 郭天錫

海岳菴空久已仙
風神超邁畫中傳
凌雲健筆飛光怪
不顧人間喚米顛

李昇林泉高隱圖

郭天錫

為厭繁華愛好山
幽棲贏得此身閒
生平已足林泉興

留取高名滿世間

閒展山水手卷

元 歐陽玄

十年京國看圖畫半幅雲煙亦惱儂今日身行屏障裏
却思移住最高峰

高房山畫

元 王士熙

吳山重疊粉團高有客晨興灑墨毫百兩真珠難買得
越峰壓倒湧金濤

董源山閣談禪圖

元 吳鎮

山閣深沈樹影涼
瀑流飛沫濺匡牀
多君相對坐終日
話到無生味更長

李公麟大阿羅漢圖

吳鎮

瀟灑龍眠不可呼
彩毫猶喜未模糊
天台五百知何處
還向圖中證有無

荆浩秋山問奇圖

吳鎮

霜落林端萬壑幽
白雲紅葉入谿流
朝來尚有尋真至
共向山亭領素秋

右丞秋山晚岫

吳鎮

右丞已往六百載翰藻神工若箇同千嶂遠橫秋色裏
山家遙帶暮煙中

李昭道秋山無盡圖

吳鎮

奇峰倒映青冥立絕壁高懸白霧開萬里無雲見秋末
千林有雨向春回

盧鴻嵩山草堂圖

吳鎮

盧鴻仙去五百載一段高風未可攀忽覩草堂清絕處

分明几案有高山

馬遠放鶴圖

吳鎮

載鶴輕舟湖上歸
重重樓閣鎖煙霏
仙家正在幽深處
竹裏雞聲半掩扉

王叔明卷

吳鎮

短簾幾許容丘壑
鬱鬱喬林更著山
應識王郎曾次好
未教消得此身閒

趙仲穆東山圖

吳鎮

東山為樂奈蒼生望重須知亦累情
蠟屐春來行更好
桃花洞口笑相迎

趙伯駒畫

吳鎮

瓊館芙蓉罨畫山
天香縹緲碧雲閒
鶴巢松頂藤花落
一任山人指顧間

子昂仿張僧繇

吳鎮

雨過秋塘泛曲湍
歸人欲渡俯平灘
前邨遙望炊煙起
更有新篳破曉寒

子昂仿陸探微

吳鎮

客子行吟徑路幽一聲啄木綠陰稠
芙蓉倒映空江色危立谿頭幾點鷗

子久春山仙隱

吳鎮

山家處處面芙蓉一曲谿歌錦浪中
隔岸游人何處去數聲雞犬夕陽紅

題畫

吳鎮

草堂仍著薜蘿遮地僻林深有幾家
莫道春風吹不到

門前依舊鳥銜花

其二

千仞巔崖勢欲傾
飛流濺眼雪花明
長風卷入層雲去
都作天台暮雨聲

王維雪渡圖

元黃公望

摩詰仙遊五百年
畫稱雪渡未能傳
只因曾入宣和府
珍重令人綴短篇

郭忠恕仙峰春色圖

黃公望

仙人原自愛蓬萊
瑤草金芝次第開
欸乃櫂歌青雀舫
逍遙響屨鳳凰臺

曹雲西畫卷

黃公望

十載相逢正憶君
忽從紙上見寒雲
空江漠漠漁歌度
一片疎林帶夕曛

王洽雲山圖

黃公望

石橋遙與赤城連
雲鎖瓊樓滿樹煙
不用飈車凌弱水
人間自有地行仙

黃荃花谿仙舫圖

黃公望

花發枝頭水漲谿仙舟猶泊武陵隄重重樓閣仙雲卷
無數青峰出竹西

董北苑畫柳

黃公望

一片閒雲出岫來袈裟不染世間埃獨憐陶令門前柳
青眼偏逢惠遠開

李營丘真蹟次俞紫芝韻

黃公望

營丘自是浪仙流寫得空山一段秋古木千章施錦繡

風光都屬幔亭收

趙伯駒

黃公望

露濕庭松偃蓋青一聲野鶴隔疎櫺
仙翁來往無拘束閒向琳宮讀道經

方方壺畫

黃公望

魴石磯頭宿雨晴蛟峰祠下樹冥冥
一江春水浮官綠千里歸舟載客星

題畫

黃公望

茂林石磴小亭邊
遙望雲山隔淡煙
却憶舊遊何處似
翠蛟亭下看流泉

題春江小景圖

元黃清老

小艇無人載綠陰
白鷗門外筍成林
不知多少山中雨
染得一江春水深

題桶底圖

元薛漢

藥珠宮闕見毫釐
中有羣仙按羽衣
莫訝此圖天地窄
黍銖境界更希微

吳仲圭山水

元倪瓚

道人家住梅花邨
窻下松醪滿石樽
醉後揮毫寫山色
嵐霏雲氣淡無痕

王叔明畫

倪瓚

筆精墨妙王右軍
澄懷卧遊宗少文
王侯筆力能扛鼎
五百年來有此君

李伯時畫

倪瓚

飛仙遊騎龍眠畫
貌得形模也自奇
句曲真人親鑒定

不須言下更題詩

為吳溥泉畫窠石平遠并詩

倪瓚

地僻林深無過客
松門元自不曾關
展將一幅谿藤滑
寫得谿陰數點山

荆谿秋色圖為卜震亨題

倪瓚

罨畫谿頭秋水明
上人逸筆思縱橫
雲山多少玄暉句
不道臺端畫得成

題畫贈僧

倪瓚

笠澤依稀雪意寒
澄懷軒裏酒杯乾
篝燈染筆三更後
遠岫踈林亦耐看

自題小畫

倪瓚

逸筆縱橫意到成
燒香弄翰了餘生
窻前竹樹依苔石
寒雨蕭條待晚晴

題王元章畫萬玉圖

元郊韶

西湖千樹玉交加
清夜掀篷看雪花
狂殺山陰王處士
興來放筆掃橫斜

十八學士圖

元 貢性之

聞說瀛洲尺五天
會中賓客總成仙
分明一段風流夢
猶向人間畫裏傳

題黃子久畫

貢性之

此老風流世所知
詩中有畫畫中詩
晴窗笑看淋漓墨
贏得人呼作大癡

題高尚書秋山暮靄圖

元 沈 右

高侯筆法妙天下
貌得江南雨後山
都是乾坤清淑氣

興來移入畫圖間

題米元暉畫雲圖

元 吳全節

谿上青山過雨濃
分明倒浸玉芙蓉
令人却憶匡廬頂
百丈銀河下碧峰

其二

雨外夕陽搖樹明
山雲吞吐亂陰晴
飛帆一點知誰是
疑在元暉畫裏行

題小山水景

元 吳志淳

小舟何處問通津二月東湖柳色新老向天涯頻見畫
一枝曾折送行人

盛叔章畫

元 鮑 恂

煙濕空林翠靄飄渚花汀草共蕭蕭仙家應在雲深處
祇許人間到石橋

題畫

元 馬 臻

月華如水天如空蒼煙遠樹涵秋容筆頭墨盡意不盡
參錯雲山三四重

徑山寺僧山水

元張雨

澄心蘭紙墨花香上有元暉古印章怪底徑山山寺裏
老僧衣袖著瀟湘

題趙松雪畫

明虞堪

王孫今代玉堂仙自畫苔谿似輞川如此青山紅樹底
那無十畝種瓜田

題雲林畫

明李至剛

故家池館錫山阿門徑寧容俗士過清閼閣空詩社散

蛛絲窻外落花多

題畫

明 胡儼

遙看瀑布落寒青
野服烏巾自在行
好似匡廬讀書處
滿林紅葉夜猿聲

題米老山水

明 王偁

海岳菴前覓舊蹤
蒼茫雲樹米南宮
別來幾片青山影
都付寒鷗一笛風

題彥顥畫中小景

明 聶大年

水禽沙鳥自相呼
遠近雲中半有無
一葉扁舟兩三客
載將煙雨過西湖

為香山顧敬中題畫

明賀甫

芳草晴煙處處迷
畫堂應在畫橋西
花開記得尋君日
一路香風送馬蹄

題畫次矯以明韻

賀甫

畫舫西湖載酒行
藕花風度管絃聲
餘情未盡歸來晚
楊柳池臺月又生

題畫

明唐寅

紅樹中間飛白雲
黃茅檻底界斜曛
此中大有逍遙處
難說于君畫與君

茂之乞畫楚山圖余將遊武林走筆戲答

明胡宗仁

片帆已挂曉須開
無奈遊情日與催
欲畫楚山青萬疊
待余行看越山來

畫家霜景與煙景
淆亂余未有以易也
丁酉冬

燕山道上乃始悟之題詩驛樓云

明董其昌

曉角寒聲散柳隄千林雪色亞枝低行人不到邯鄲道
一種煙霜也自迷

題畢鉢山圖

明陳繼儒

畢鉢羅峰迴入霄不通猿鳥不通樵橫空獨木如飛棧
半月山人一換橋

題畫

明李日華

霜落蒹葭水國寒
浪花雲影上漁竿
畫成未擬將人去
茶熟香溫且自看

題自畫秋林平遠

明
張宇初

北苑高情宿世同
疎林汀渚正秋風
硯池灑墨應多思
寫向寒煙夕照中

題畫

明
僧守仁

積雨平原煙樹重
翠厓千丈削芙蓉
招提更在秋雲外
只許行人聽曉鐘



御定佩文齋詠物詩選卷一百八十四



總校官庶吉士臣侍朝

校對官主事臣張培

膳錄監生臣陸費鑒

膳錄監生臣李炎